

Na osnovu člana 37 stav 4 tačka 3 Statuta Bokeljske mornarice Kotor, Upravni odbor i Admiralat Bokeljske mornarice Kotor su, na zajedničkoj sjednici održanoj dana 31.januara 2019.godine, donijeli

PRAVILNIK o izmjenama i dopunama

PRAVILNIKA O ODORI, ČINOVIMA I NASTUPIMA AKTIVNOG SASTAVA BOKELEJSKE MORNARICE KOTOR

Član 1

U Pravilniku o odori, činovima i nastupima aktivnog sastava Bokeljske mornarice Kotor, donijetom na zajedničkoj sjednici Upravnog odbora i Admiralata održanoj dana 11.jula 2017.godine, član 2 mijenja se i glasi:

"Ovim pravilnikom se uređuje formiranje Glavnog odreda Bokeljske mornarice, nošenje zastava kao i pojedinačni nastupi kotorskog odreda i odreda podružnica."

Član 2

Član 3 mijenja se i glasi:

"Aktivni sastav Bokeljske mornarice čine najviše 46 oficira i podoficira (23 oficira i 23 podoficira).

Oficirski sastav Bokeljske mornarice čine: admiral, viceadmiral, prvi i drugi major, tri kapetana (komandiri kotorskog odreda i odreda podružnica), adutant, koji je po činu poručnik, i 15 poručnika.

Podoficirski sastav Bokeljske mornarice čine: 12 vodnika i 11 mlađih vodnika.

Kotorski odred i odred podružnice Tivat imaju najviše po šest (6) oficira i po deset (10) podoficira.

Odred podružnice Herceg Novi ima najviše četiri (4) oficira i tri (3) podoficira."

Član 3

Član 4 mijenja se i glasi:

"Aktivni sastav Bokeljske mornarice ima Glavni odred kojeg čine kotorski odred i odredi podružnica."

Član 4

Član 5 mijenja se i glasi:

"Kotorski odred formira komandu odreda kao svoj operativni organ, koju čine:

1. komandir odreda (kapetan)
2. barjaktar
3. poručnik
4. dva vodnika
5. mlađi vodnik i
6. tri mornara.

Na čelu komande odreda je komandir, koji je po činu kapetan i čiji zadatak je da po potrebi saziva komandu kotorskog odreda."

Član 5

Član 6 mijenja se i glasi:

"Komanda kotorskog odreda:

- organizuje nastup odreda;
- informiše članove odreda o nastupima i drugim aktivnostima;
- upoznaje Upravni odbor i Admiralat sa donijetim zaključcima u cilju efikasnijeg rada odreda;
- predlaže Admiralatu članove za unapređenje i razriješenje i
- predlaže delegate Matice za Skupštinu Bokeljske mornarice Kotor."

Član 6

Član 7 mijenja se i glasi:

"Kotorski odred i odredi podružnica treba da imaju odrede sa najmanje petnaest mornara i sa komandirom odreda, u skladu sa ovim pravilnikom."

Član 7

Član 12 mijenja se i glasi:

"Admiral stoji na čelu Admiralata i aktivnog sastava Bokeljske mornarice i neposredno ih predstavlja u svim prigodama i svečanostima.

Admiral u odori nastupa samo sa Glavnim odredom Bokeljske mornarice.

Izuzetno, po svom nahođenju, admiral i viceadmiral mogu nastupiti sa kotorskim odredom ili odredima podružnica.

Admiral predvodi delegaciju Bokeljske mornarice, prima izvještaje od prvog majora o stanju aktivnog sastava, saziva sjednice Admiralata i aktivnog sastava, i punopravno, sa pravom glasa prisustvuje sjednicama Upravnog odbora i ostalih organa Bokeljske mornarice.

Admiral vrši i druge poslove u vezi sa aktivnim sastavom Bokeljske mornarice neposredno ili preko ađutanta i prvog majora."

Član 8

Član 17 mijenja se i glasi:

"Prvi major redovno i na vrijeme, zajedno sa komandirima kotorskog odreda i odreda podružnica, poziva sve mornare i oficire da učestvuju u nastupima iz člana 50 ovog Pravilnika."

Član 9

Član 18 mijenja se i glasi:

"Svake godine do 13. januara prvi major, u saradnji sa ađutantom, podnosi Admiralatu pisani izvještaj o učešću Bokeljske mornarice u proslavama u prethodnoj godini, broju učesnika, disciplini i o svemu ostalom što je važno za Admiralat.

Pored ovog izvještaja prvi major, takođe, u saradnji sa domaćinom Bokeljske mornarice i domaćinima podružnica, podnosi pisani izvještaj o stanju oružja i odora Bokeljske mornarice kao i o svim problemima u vezi sa tim."

Član 10

Član 19 mijenja se i glasi:

"Admiralat imenuje i razriješava ađutanta, koji je po činu poručnik.

Ađutant prati admirala prilikom vršenja smotre i prijema raporta postrojenog odreda Bokeljske mornarice, i prilikom defilea postrojen je uz admirala.

Ađutant je u svom radu neposredno podređen admiralu i Admiralatu."

Član 11

Član 20 mijenja se i glasi:

"Osnovne dužnosti ađutanta su da:

- vodi imenik mornara i oficira, sa ličnim podacima o mjestu zaposlenja, adresama i brojevima telefona, te ga uredno dopunjuje ili mijenja, prema odlukama Admiralata. Tako kompletan, ažurirani imenik izlaže Admiralatu svake godine do 13. januara;
- u saradnji sa komandirima kotorskog odreda i odreda podružnica, vodi posebnu knjigu, u kojoj su zabilježeni svi oficiri i mornari koji su uzeli učešća tokom godine na proslavama i drugim manifestacijama, uz kratak opis obavljenog nastupa;
- knjigu iz alineje 2 ovog člana ađutant dostavlja prvom majoru do kraja tekuće godine;
- obavlja i sve druge poslove koje mu povjeri Admiralat."

Član 12

Član 30 mijenja se i glasi:

"Tradicionalnu odoru Bokeljske mornarice mogu da nose članovi aktivnog sastava Bokeljske mornarice i to samo u svečanim prilikama, pri nastupima Glavnog odreda

Bokeljske mornarice, kotorskog odreda ili odreda podružnica, dok pojedinačno samo u izuzetnim prilikama po odobrenju Admiralata Bokeljske mornarice."

Član 13

Član 31 mijenja se i glasi:

"Odoru Bokeljske mornarice, po pravilu, drže Matica i podružnice u svojim prostorijama, urednu i propisano složenu ili pak u muzejima.

Ako podružnica iz svojih sredstava pribavi odoru ista postaje njen vlasništvo."

Član 14

Član 33 mijenja se i glasi:

"Odora i oznaka činova aktivnog sastava Bokeljske mornarice su:

a) Admirala

Odoru admirala čine:

- bijeli, krzneni kalpak sa bijelom perjanicom (ponponom) pričvršćenom na prednjoj strani mesinganim grbom Bokeljske mornarice. Ispod grba su dva prepletena zlatna gajtana, jedan deblji i drugi tanji, koji su sa strane grba pričvršćeni zlatnim kitama;
- bijela tvrda košulja, obrubljena na prsima čipkom i crna leptir mašna;
- crne široke gaće od svile, čije su nogavice obrubljene tankom zlatnom vrpcom;
- svileni pas i ječerma od svilenog baršuna sa zlatnim kitama;
- crna dolama od svile sa zlatnim širitom oko vrata i sa dvije zlatne kite otraga.

Na lijevom i desnom rukavu dolame su obilježja admiralskog čina i to:

jedna vodoravno prišivena zlatna vrpca široka 2 cm, povrh nje druga tanja vrpca od 1.5 cm, a nad njom u okomitom smjeru spojen zlatni poluluk iste širine;

- visoke lakovane čizme sa zlatnim kitama na zadnjem dijelu;
- sablja sa zlatnom kuglom, admiralski štap i bijele rukavice.

b) Viceadmirala

Odora viceadmirala je kao i u admirala, s tim što na rukavima dolame nosi obilježja viceadmiralskog čina, jedna vodoravno prišivena zlatna vrpca širine 2 cm sa polulukom kao u admirala, ali bez tanke vodoravne zlatne trake.

c) Prvog majora

Odoru prvog majora čine:

- kafeni, krzneni kalpak kao u admirala, samo što je perjanica crna, a gajtan ispod grba nešto tanji;
- košulja, gaće, pas, ječerma i dolama kao u admirala, s tim što zlatni širit oko vrata dolame ne smije da bude širi od 1 cm;

- obilježja majora prišivena su samo na lijevom rukavu dolame: vodoravno oko rukava zlatna vrpca širine 1.5 cm, a iznad nje druga vrpca, širine 1 cm, zlatom ukrašena sa jednom kosom vrpcom iste širine;
- visoke crne bječve do koljena i crne otvorene niske cipele sa uzлом (mašnicom) od crne vrpce, širine 2 cm;
- sablja sa zlatnom kuglom i
- bijele rukavice.

d) Drugog majora

Odoru drugog majora čine:

- krzneni kalpak, kao u prvog majora sa nešto manjom perjanicom i jednim zlatnim gajtanom;
- košulja, kravata, gaće, pas, ječerma i dolama kao u prvog majora, samo bez zlatnog širita oko vrata;
- obilježja drugog majora prišivena su oko lijevog rukava dolame, zlatna vrpca širine 1.5 cm i iznad nje kosa, zlatom ukrašena vrpca širine 1 cm;
- sablja, bječve, cipele kao i u prvog majora i
- bijele rukavice.

e) Kapetana

Odora kapetana je kao u drugog majora, samo što oko lijevog rukava dolame ima tri vodoravne zlatne vrpce širine 1 cm.

f) Poručnika

Odora poručnika je kao u kapetana, samo što oko lijevog rukava dolame ima dvije zlatne vrpce širine 1 cm.

Adutant je po činu poručnik i ima odoru tog čina. Njegovo obilježje jeste zlatni gajtan sa sidrom preko desnog ramena i lijeve strane prsiju.

g) Podoficira (vodnika i mlađeg vodnika)

Odora podoficira (vodnika i mlađeg vodnika) je kao u mornara.

h) Mornara

Odoru mornara čine:

- mornarska kapa (ćeverica) sa tepelukom i cvijetom;
- bijela košulja na prsima obrubljena čipkom i leptir mašna;
- ječerma od svilenog baršuna sa zlatnim kitama;
- koret od crne ili tamnosmeđe lanene svile obrubljen zlatnim gajtanom, a rukavi nešto podvrnuti;
- gaće kao i u oficira, ali od crnog satena;

- bječve crne do koljena, a cipele niske (mulice) i otvorene, sa uzlom od šivene crne vrpce (mašnica);
- pas od svile (satena) plave, lila ili crvene boje, o pojasu visi tobolac od svile ili baršuna vezen zlatom;
- čemer od baršuna vezen zlatom na kojem je izvezen grb Bokeljske mornarice;
- male puške i nož zataknuti za pasom, straga oko pasa i desne strane vise dvije veće čese, a na desni bok sprijeda, jedna manja česa. Čese su srebrne, pozlaćene ili od metala;
- puška: džeferdar ili šaralija sa zelenom vrpcom.

i) Barjaktara

Barjaktari su odjeveni kao mornari, samo bez malih pušaka, česa i čemera. Svaki barjaktar uz bok nosi mač. Na rukama imaju bijele rukavice.

U nastupima jedan barjaktar nosi državnu zastavu, a drugi istorijsku zastavu Bokeljske mornarice.

Podružnice mogu imati svoje barjaktare koji nastupaju kada njihovi odredi sami nastupaju u svečanostima.

j) Kopljanika

Odora kopljanika je kao u mornara, ali bez pušaka i sa bijelim rukavicama.

k) Kolovođe, zadnjeg od kola i njihovih zamjenika

Kolovođa je odjeven kao mornar ali bez oružja, čese i čemera i nosi dolamu poručnika i bijele rukavice. Ako je kolovođa oficir, kad ne vodi kolo, nosi odoru odgovarajućeg čina.

Kolovođa ima svog zamjenika koji ga zamjenjuje u njegovoj odsutnosti. Kolovođa i njegov zamjenik mogu imati oficirski čin.

Za zadnjeg od kola i njegovog zamjenika važi isto kao i za kolovodiju.

l) Malog admirala

Odora malog admirala je kao odora mornara, samo bez puške (džeferdara ili šaralije), i sa malom puškom ili kuburom.

Na rukama ima bijele rukavice."

Član 15

Član 38 mijenja se i glasi:

"Imenovanje i unapređenje u viši čin i razrešenje čina – funkcije iz aktivnog sastava, do čina drugog majora, vrši Admiralat na predlog kotorskog odreda i podružnica Bokeljske mornarice.

Imenovanje i unapređenje u viši čin i razrešenje čina – funkcije iz aktivnog sastava, drugog i prvog majora, viceadmirala i admirala vrši Skupština na predlog Admiralata."

Član 16

Član 40 mijenja se i glasi:

"Članovi aktivnog sastava, koji su to zaslužili svojim radom u aktivnom sastavu Bokeljske mornarice, prilikom razrešenja čina – dužnosti mogu da se unaprijede u slijedeći viši počasni čin i tada im se dodjeljuje Povelja."

Član 17

Član 49 mijenja se i glasi:

" Postupanje članova aktivnog sastava:

a) prilikom nastupa i plesanja Kola

- ne nose naočale za sunce, žvaću žvakaće gume, upotrebljavaju mobilni telefon, puše i razgovaraju.
- podoficiri i mornari bez oružja ne nose cvijet na kapi;
- b) prilikom ulaska u crkvu
- ukoliko odred Bokeljske mornarice ulazi u crkvu organizovano (sa komandirom ili bez njega), tada ulazi sa oružjem i kapom na glavi;
- ukoliko članovi aktivnog sastava u odori Bokeljske mornarice ulaze u crkvu pojedinačno, tada skidaju kapu i odlažu oružje.
- kopljanici, dok čuvaju stražu pored moći i drugih objekata, ne skidaju kapu sa glave."

Član 18

Član 50 mijenja se i glasi:

"Glavni odred Bokeljske mornarice okuplja se u tradicionalnoj odori, pod oružjem i sa zastavama:

1. Prigodom i za vrijeme trajanja proslave zaštitnika grada Kotora sv. Tripuna,
2. Na Dan Bokeljske mornarice,
3. Na Zavjetni dan u Perastu (Dan Gospe od Perasta, 15. maja.),
4. Može da učestvuje na proslavama Matice i Podružnica, ukoliko za to postoje mogućnosti, prigodom Dana Opština Kotora i Podružnica i drugih prigodnih svečanosti, u njihovim mjestima, koje Admiralat smatra opravdanim,
5. Na molbu državnog protokola, prilikom dolaska visokih gostiju iz inostranstva,
6. Prilikom smrti aktivnih admirala, viceadmirala i predsjednika Upravnog odbora i
7. U drugim prilikama, prema ocjeni svrshishodnosti od strane Admiralata."

Član 19

U članu 51 odjeljci *Vanjska proslava Sv. Tripuna i 2. Proslava Dana Bokeljske mornarice mijenjaju se i glase:*

"Vanjska proslava Sv. Tripuna

Kotorski odred sa oružjem i zastavom Bokeljske mornarice postrojava se ispred Doma Bokeljske mornarice, na Pjaci od kina.

Odred, predvođen Gradskom muzikom, ide ispred Glavnih gradskih vrata da dočeka odrede podružnica iz Tivta i H. Novoga i postrojava se lijevo od Vrata od grada.

Odredi podružnica Tivta i H. Novoga sa svojom Gradskom muzikom dolaze i postrojavaju se desno od Vrata od grada, do Gradske muzike iz Kotora.

Komandiri kotorskog odreda i odreda podružnica komanduju „prikaž'te“, te komandir odreda podružnica predaje raport komandiru kotorskog odreda riječima:

„Gospodine kapetane, odredi podružnica Tivat i H. Novi postrojeni su u u čast Sv. Tripuna, zaštitnika grada Kotor a i u Vašu čast spremni su za smotru. Raport podnosi kapetan ... (ime i prezime)“.

Komandir kotorskog odreda vrši smotru postrojenih oficira, podoficira i mornara Podružnica, kojom prilikom pozdravlja državnu zastavu i na kraju pozdravlja prigodnim riječima: „**Mornari, podoficiri i oficiri Bokeljske mornarice Tivta, H. Novoga, dobro došli u Kotor na Vanjsku proslavu Sv. Tripuna, zaštitnika grada Kotor, zdravo!**“

Članovi odreda podružnica odgovaraju: „Zdravo!“

Nakon toga komandiri odreda komanduju „na rame“ i ide se ispred Doma Bokeljske mornarice, na Pjacu od kina, sledećim redoslijedom:

Gradska muzika Kotor,

Kotorski odred Bokeljske mornarice,

Gradska muzika Tivat,

Odred Podružnice Tivat,

Gradska muzika H. Novi,

Odred Podružnice H. Novi.

(Ukoliko nema jedne od muzika, odredi podružnica Tivat i H. Novi idu zajedno.)

Nakon dolaska ispred Doma Bokeljske mornarice, na Pjaci od kina formira se Glavni odred, kada komandovanje preuzima prvi major, koji predaje raport viceadmiralu riječima: „**Gospodine viceadmirale, Glavni odred starodrevne Bokeljske mornarice postrojen u Vašu čast spremni je za smotru. Raport podnosi prvi major ... (ime i prezime)“.**

Viceadmiral vrši smotru i pozdravlja Glavni odred riječima: “Mornari, podoficiri i oficiri Bokeljske mornarice, zdravo!“

Članovi Glavnog odreda odgovaraju: „Zdravo!“

Admiral sa ađutantom odlazi u Biskupiju i čeka Glavni odred.

Glavni odred sa Gradskim muzikama odlazi preko Pjace od sata na Pjacu ispred bazilike – katedrale Sv. Tripuna i postrojava se licem prema bazilici – katedrali.

Prvi major predaje raport admiralu riječima: „**Gospodine admirale, Glavni odred starodrevne Bokeljske mornarice postrojen u čast Svetog Tripuna i u Vašu čast spremam je za smotru. Raport podnosi prvi major ... (ime i prezime)**“. Admiral vrši smotru i pozdravlja Glavni odred riječima: “**Mornari, podoficiri i oficiri Bokeljske mornarice, zdravo!**“

Članovi Glavnog odreda odgovaraju: „Zdravo!“

Nakon raporta i pozdrava, admiral sa ađutantom priključuje se odredu, kada slijedi počasna paljba. Za vrijeme počasne paljbe oficiri, na komandu „nakrcajte“ pozdravljaju u stavu „prikaž'te“.

Nakon počasne paljbe prvi major komanduje „sloboda“ kada admiral, viceadmiral, ađutant i mali admiral odlaze ispod lođe bazilike-katedrale, a plesači kola sa kolovođom odlaze u dvorište Biskupije radi pripreme za plesanje kola. Ostali oficiri, podoficiri i mornari raspoređuju se oko rubnih pojasa pjace, održavajući red za vrijeme plesanja kola.

Bivši i ostali mali admirali stoje sa ženskim članovima za vrijeme plesanja Kola.

Prije početka kola, kolovođa moli biskupa za blagoslov kola i dozvolu za početak plesanja kola riječima: „**Gospodine biskupe, molim Vaš blagoslov za plesanje kola u slavu Božju i čast Sv. Tripuna!**“

Prije završetka kola, admiral sa ađutantom, viceadmiral, mali admiral, prvi major, barjaktari sa zastavama, biskup kotorski i visoke zvanice, koje pozove admirala, ulaze u kolo i oko njih mornari izvode završnu figuru.

Po završetku kola, mornari podizanjem čeverica (kapa) i uzvikom „Slava“ pozdravljaju narod okolo.

Nakon kola, admirala, ađutanta, viceadmirala, mali admiral, prvi major i ko želi od oficira, podoficira i mornara prisustvuju sv. misi u bazilici – katedrali Sv. Tripuna.

U procesiji, ulicama Kotora, Glavni odred stupa na čelo procesije, odmah iza Gradske muzike Kotor.

Osam mornara nose moći u pratnji dva kopljaničnika, dok druga dva kopljaničnika stupaju uz zastave.

Prilikom povratka procesije Glavni odred je postrojen ispred sjevernog i južnog zvonika bazilike-katedrale, u dva reda, sučelice jedan drugom u stavu „prikaž'te“. Admirala, viceadmirala, ađutanta i mali admiral sa barjaktarima i kopljanicima postrojavaju se ispred sjevernog zvonika. "

"2. Proslava Dana Bokeljske mornarice

Član 52

Glavni odred formira se ispred Doma Bokeljske mornarice, na Pjaci od kina, gdje prvi major predaje raport viceadmiralu riječima: „**Gospodine viceadmirale, Glavni odred starodrevne Bokeljske mornarice postrojen u Vašu čast spremam je za smotru. Raport podnosi prvi major ... (ime i prezime)**“.

Viceadmiral vrši smotru i pozdravlja članove Glavnog odreda riječima: mornari, podoficiri i oficiri Bokeljske mornarice zdravo, na što mu oni odgovaraju „Zdravo“.

Glavni odred ide do Skupštine opštine, radi prijema državne zastave.

Po dolasku ispred Skupštine opštine, Glavni odred postrojava se licem prema zgradi Skupštine opštine. Ukoliko prostor ne dozvoljava, odred se postrojava čelom prema zgradi Skupštine opštine.

Admiral sa adžutantom sačekuje odred ispred zgrade Skupštine opštine. Nakon dolaska odreda pridružuje se odredu i poziva barjaktara sa kopljanicima da mu se pridruže kod preuzimanja državne zastave.

Admiral, mali admiral, adžutant i barjaktar odlaze u zgradu Opštine, a kopljanici čekaju ispred vrata, radi preuzimanja državne zastave.

Admiral pozdravlja gradonačelnika/cu ili osobu koju on odredi i moli ga (je) da, po tradicionalnom običaju, preda Bokeljskoj mornarici državnu zastavu.

Gradonačelnik/ca otpozdravlja admiralu, sa nekoliko prigodnih riječi, čestita svečanost i predaje državnu zastavu admiralu, koju on opet predaje barjaktaru.

Barjaktar preuzima zastavu i svi zajedno vraćaju se na svoja mjesta. Čim se pojavi zastava, prvi major u počast zastavi, zapovijeda „prikaž'te“.

Nakon toga Glavni odred, uz pratnju Gradske muzike, obilazi grad **Zanatskom ulicom** i, ukoliko to uslovi dozvoljavaju preko Tabačine, dolazi ispred Glavnih gradskih vrata.

Ukoliko ne postoje uslovi za obilazak grada na način predviđen u prethodnom stavu ovog člana, Glavni odred obilazi grad Zanatskom ulicom pored crkve Sv.Marije Koleđate (Blažene Ozane) i ulicom Fra Vita Kotoranina dolazi ispred Glavnih gradskih vrata.

Admiral sa adžutantom čeka Glavni odred ispred Glavnih gradskih vrata, gdje prima raport od prvog majora riječima: „**Gospodine admirale, Glavni odred starodrevne Bokeljske mornarice postrojen u čast Dana Bokeljske mornarice i u Vašu čast spremam je za smotru. Raport podnosi prvi major ... (ime i prezime)**“. Admiral zatim vrši smotru Glavnog odreda, pozdravlja Glavni odred i čestita praznik riječima: “**Mornari, podoficiri i oficiri Bokeljske mornarice, sretan vam Dan Bokeljske mornarice, zdravo!**“ **Glavni odred odgovara:** „**Zdravo!**“ Nakon raporta i pozdrava, admiral sa adžutantom priključuje se odredu, kada slijedi počasna paljba. Za vrijeme počasne paljbe oficiri, na komandu „nakrcajte“, pozdravljaju u stavu „prikaž'te“.

Gradonačelnik/ca uručuje ključeve grada Kotora admiralu Bokeljske mornarice, kao simbol predaje vlasti Bokeljskoj mornarici i sa nekoliko prigodnih riječi pozdravlja admirala.

Admiral otpozdravlja gradonačelniku/ci na pozdrav.
Ključevi grada Kotora uručuju se Bokeljskoj mornarici samo prilikom proslave Dana Bokeljske mornarice.

Po završenom tradicionalnom ceremonijalu, Glavni odred ulazi u grad, gdje na Pjaci od sata glavni kolovođa okuplja mornare i uz pratnju Gradske muzike vodi svečano kolo.

U poslednjoj figuri – slici kola, u kolo ulaze: admiral, viceadmiral, adžutant, prvi major, mali admiral, barjaktari sa zastavama, gradonačelnik/ca ili predsjednik Skupštine i visoke zvanice, koje pozove admirala.

Po završetku plesanja kola, Glavni odred vraća se u Dom Bokeljske mornarice, gdje se priređuje čašćenje."

Član 20

Član 53 mijenja se i glasi:

"Po dolasku u Perast delegacija Bokeljske mornarice odlazi na grob admirala Vladislava Brajkovića, gdje polaže cvijeće i minutom čutanja odaje dužnu poštu preminulom admiralu.

Dva mornara i jedna djevojka u odorama nose cvijeće.

Glavni odred formira se ispred Vatrogasnice i zajedno sa Gradskom muzikom odlazi do Muzeja grada Perasta, odakle se vraća na Trg Sv. Nikole. Ovom prilikom u odredu nalazi se i peraška zastava, koju, po pravilu nosi, peraški oficir ili mornar.

Admiral sa adžutantom čeka Glavni odred na Trgu, gdje mu po dolasku Glavnog odreda Prvi major predaje raport riječima: „**Gospodine admirale, Glavni odred starodrevne Bokeljske mornarice postrojen u Vašu čast spreman je za smotru. Raport podnosi prvi major ... (ime i prezime)**“. Admiral vrši smotru i pozdravlja riječima: “**Mornari, podoficiri i oficiri Bokeljske mornarice, zdravo!**“. **Glavni odred odgovara: „Zdravo!“**

Mornari plešu kolo, a na kraju u kolo ulaze pored admirala, viceadmirala, prvog majora i barjaktara sa zastavama, biskup kotorski i opat peraški.

Po završetku kola, ko želi ulazi u crkvu na sv. misu.

U procesiji nakon sv. mise mornari nose sliku Gospe od Škrpjela.

Prilikom gađanja kokota, članovi Bokeljske mornarice, po tradiciji, prvi gađaju."

Član 21

U poglavlju 4. Proslava Dana Opštine Kotor i Podružnica i član 54 mijenjaju se i glase:

"Dan Opštine Kotor

Član 54

Delegacija Bokeljske mornarice odlazi na prijem kod gradonačelnika/ce Kotora.

Kotorski odred Bokeljske mornarice formira se ispred Doma Bokeljske mornarice, na Pjaci od kina, gdje komandir odreda predaje raport admiralu riječima: „**Gospodine**

admirale, odred starodrevne Bokeljske mornarice postrojen u Vašu čast spremam je za smotru. Raport podnosi kapetan ... (ime i prezime)“.

Admiral vrši smotru i pozdravlja riječima: “**Mornari, podoficiri i oficiri Bokeljske mornarice, zdravo!“ Odred odgovara: „Zdravo!“**

Zatim odred Bokeljske mornarice ide do Skupštine opštine, radi prijema državne zastave.

Odred se postrojava licem prema zgradi Skupštine opštine. Ukoliko prostor ne dozvoljava, odred se postrojava čelom prema zgradi Skupštine opštine.

Admiral, mali admiral, ađutant i barjaktar odlaze u zgradu Opštine, a kopljanci čekaju ispred vrata, radi preuzimanja državne zastave.

Admiral pozdravlja gradonačelnika/cu ili osobu koju on odredi i moli ga (je) da po tradicionalnom običaju, predla Bokeljskoj mornarici državnu zastavu.

Gradonačelnik/ca otpozdravlja admiralu, sa nekoliko prigodnih riječi, čestita svečanost i predaje državnu zastavu admiralu, koju on opet predaje barjaktaru.

Barjaktar preuzima zastavu i svi zajedno vraćaju se na svoja mjesta. Čim se pojavi zastava, komandir odreda, u počast zastavi, zapovijeda „prikaž’te“.

Nakon toga odred, uz pratnju tamburina Gradske muzike ide glavnom saobraćajnicom do Spomenika palim borcima u Park slobode, gdje delegacije polažu vijenac. Za vrijeme polaganja vijenaca odred stoji u stavu „prikaž’te“.

Iz Parka slobode, odred sa Gradskom muzikom ide glavnom saobraćajnicom i ulazi u grad na Pjacu od sata, gdje komandir odreda predaje raport gradonačelniku/ci riječima: **„Gospodine gradonačelnice/ce grada Kotora, odred starodrevne Bokeljske mornarice postrojen u čast Dana Opštine i u Vašu čast i spremam je za smotru. Raportira kapetan ... (ime i prezime)“.**

Gradonačelnik vrši smotru i pozdravlja odred riječima: Gospodo mornari, podoficiri i oficiri Bokeljske mornarice zdravo, na što im oni odgovaraju „Zdravo“.

Nakon raporta slijedi počasna paljba. Za vrijeme počasne paljbe oficiri, na komandu „nakrcajte“, pozdravljaju u stavu „prikaž’te“.

Po završetku paljbe komandir daje slobodu, a plesači kola odlaze za kolovođom da plešu kolo. U završnoj figuri kola u kolo ulaze admirali, viceadmirali, mali admirali, ađutanti, barjaktari sa zastavama i gradonačelnik/ca Kotora, kao i visoke zvanice koje pozove admirali.

Nakon kola odred, uz pratnju Gradske muzike odlazi u Dom Bokeljske mornarice, na Pjacu od kina, gdje se priređuje čašćenje.”

Član 22

Član 55 mijenja se i glasi:

“Nastupi odreda podružnica regulišu se statutima podružnica, uz poštovanje ovog Pravilnika.”

Član 23

Član 56 mijenja se i glasi:

"Na dan njihovih Opština nastupaju odgovarajući odredi Kotora i Podružnica. Kako Kotor i Tivat proslavljaju dan Opštine istoga dana (21. novembra), tada kotorski odred nastupa u Kotoru, a odred Podružnice Tivat nastupa u Tivtu, shodno njihovom planu nastupa.

Shodno članu 12 ovog Pravilnika, prema tradiciji, admiral i viceadmiral, nastupaju u Kotoru, a prema svom nahodenju jedan od njih može da nastupa u Tivtu. "

Član 24

Član 58 mijenja se i glasi:

- "1. Prilikom smrti aktivnih admirala, viceadmirala i predsjednika Upravnog odbora nastupa Glavni odred, u odorama i pod oružjem, ali bez zastava. Prilikom ukopa, a za vrijeme sviranja kola, vrši se počasna paljba, a oficiri, nazapovijed „nakrcajte“, pozdravljaju u stavu „prikažte“.
2. Prilikom smrti aktivnih oficira, počasnih admirala, viceadmirala, majora i oficira počast odaju dva oficira i četiri mornara bez oružja i bez cvijeta na kapi, koji drže počasnu stražu i prate kovčeg u sprovod.
3. Prilikom smrti aktivnih podoficira i mornara, četiri mornara (bez cvijeta na kapi) sa oficirom bez oružja drže počasnu stražu i prate kovčeg u sprovod.
4. U svim gore navedenim slučajevima na čelu sprovoda idu jedan mornar i dvije djevojke u odorama koji nose cvijeće ili vijenac Bokeljske mornarice.
5. Istim povodom, a prilikom spuštanja u grob, Gradska muzika (ako je prisutna) svira Kolo Sv. Tripuna.
6. Isto kao i u prethodnom stavu ovog člana, postupa se prilikom spuštanja u grob redovnog, zaslužnog i člana pomagača Bokeljske mornarice."

Član 25

Zadužuje se Odbor za izmjenu i dopunu Pravilnika da sačini prečišćeni tekst Pravilnika o odori, činovima i nastupima aktivnog sastava Bokeljske mornarice Kotor.

Član 26

Prečišćeni tekst Pravilnika o odori, činovima i nastupima aktivnog sastava Bokeljske mornarice Kotor čine, odnosno obuhvata:

-Pravilnik o odori, činovima i nastupima aktivnog sastava Bokeljske mornarice Kotor, donijet na zajedničkoj sjednici Upravnog odbora i Admiralata održanoj dana 11.jula 2017.godine i


-Pravilnik o izmjenama i dopunama Pravilnika o odori, činovima i nastupima aktivnog sastava Bokeljske mornarice Kotor, donijet na zajedničkoj sjednici Upravnog odbora i Admiralata održanoj dana 31.januara 2019.godine.

Član 27


Ovaj Pravilnik stupa na snagu danom donošenja.

ADMIRALAT I UPRAVNI ODBOR BOKELJSKE MORNARICE




Admiral
Prof. dr. Antun Sbutega

Predsjednik Upravnog odbora


Aleksandar Dender